

VENDIM
Nr.158, datë 25.3.2005

**PËR MIRATIMIN E RREGULLORES SË ORGANIZIMIT E TË FUNKSIONIMIT TË
KOMISIONIT QENDROR TË EKSPERTIZËS, PRANË DREJTORISË SË PËRGJITHSHME
TË ARKIVAVE**

Në mbështetje të nenit 100 të Kushtetutës dhe të neneve 14 e 94 të ligjit nr.9154, datë 6.11.2003 "Për arkivat", me propozimin e Zëvendëskryeministrit, Këshilli i Ministrave

VENDOSI:

1. Miratimin e rregullore së organizimit dhe të funksionimit të Komisionit Qendror të Ekspertizës, pranë Drejtorisë së Përgjithshme të Arkivave, që i bashkëlidhet këtij vendimi.
 2. Rregullorja e Komisionit Qendror të Ekspertizës, miratuar me vendimin nr.398, datë 22.8.1994 të Këshillit të Ministrave "Për miratim rregulloresh", shfuqizohet.
 3. Efektet financiare për shpërblimin e anëtarëve të këtij Komisioni, si dhe çdo efekt tjetër financiar që rrjedh nga zbatimi i këtij vendimi, të përballohen nga buxheti i miratuar për Drejtorinë e Përgjithshme të Arkivave.
- Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano

RREGULLORE
PËR KOMISIONIN QENDROR TË EKSPERTIZËS

Neni 1
Baza ligjore

Komisioni Qendror i Ekspertizës (më tej KQE) formohet dhe funksionon pranë Drejtorisë së Përgjithshme të Arkivave (më tej DPA) në mbështetje të nenit 14 pika 1, 3 të ligjit nr.9154, datë 6.11.2003 "Për arkivat".

Neni 2
Përkufizim

KQE është organizëm ndërinstitutional vendimmarrës. Përbërja, detyrat dhe funksionet e tij përcaktohen me këtë rregullore.

Neni 3
Përbërja e KQE-së

KQE-ja përbëhet nga 15 anëtarë, 7 të brendshëm dhe 8 të jashtëm. Anëtarët e brendshëm janë specialistë me përvojë në fushën e arkivistikës, në rrjetin arkivor që administrohet nga DPA-ja. Anëtarë të jashtëm të KQE-së janë punonjës shkencorë e specialistë të institucioneve të tjera, të përcaktuara me këtë rregullore.

Neni 4
Anëtarët e brendshëm të KQE-së

Anëtarët e brendshëm të KQE-së caktohen nga Drejtori i Përgjithshëm i Arkivave. Ata përzgjidhen nga arkivistët që kanë përvojë pune në shërbimin arkivor mbi 10 vjet.

Neni 5
Anëtarët e jashtëm të KQE-së

Anëtarët e jashtëm të KQE-së caktohen nga titullarët e institucioneve që përfaqësojnë si më poshtë:

- Një përfaqësues i Ministrisë së Kulturës, Rinisë dhe Sporteve;
- Një përfaqësues i Institutit të Statistikës;
- Një përfaqësues i Arkivit Qendror Teknik;
- Një përfaqësues i Arkivit Qendror të Filmit;
- Dy përfaqësues të Ministrisë së Financave dhe/ ose institucioneve në varësi të saj.
- Dy përfaqësues të arkivave të sistemit, që zgjidhen nga mbledhja e drejtorëve të tyre, me votim të fshehtë.

Neni 6

Shpallja e përbërjes

Përbërja e KQE-së shpallet me urdhër të Drejtorit të Përgjithshëm të Arkivave, pas zgjedhjes/emërimit të anëtarëve të jashtëm dhe atyre të brendshëm.

Mbledhja e parë e KQE-së bëhet jo më vonë se një muaj nga data e shpalljes së përbërjes.

Neni 7

Kryetari

Kryetari i KQE-së është Drejtori i Përgjithshëm i Arkivave. Kryetari miraton rendin e ditës dhe drejton mbledhjet e KQE-së.

Neni 8

Sekretari

Në mbledhjen e parë bëhet zgjedhja e sekretarit. Sekretari zgjidhet me dy të tretat e votave të anëtarëve të pranishëm në mbledhje.

Për funksionin e sekretarit kandidojnë vetëm anëtarët e brendshëm të KQE-së, që ushtrojnë detyrën e inspektorit të përgjithshëm.

Sekretari drejton mbledhjet e KQE-së në mungesë dhe me urdhër të kryetarit.

Neni 9

Mbledhja e KQE-së

KQE mbledhet kur është e pranishme më shumë se gjysma e anëtarëve.

KQE mbledhet jo më pak se një herë në vit.

Rendi i ditës dhe materialet e mbledhjes vihen në dispozicion të anëtarëve të KQE-së jo më vonë se dhjetë ditë para mbledhjes.

Rendi i ditës propozohet nga sekretari dhe miratohet nga kryetari i KQE-së. Procesverbali i mbledhjes mbahet nga sekretari i KQE-së.

Materialet e mbledhjes shoqërohen me relacion shpjegues. Në mbledhjet kur KQE-ja ushtron kompetencat e parashikuara në nenin 11/2 të kësaj rregulloreje merr pjesë përfaqësuesi i institucionit fondkrijues.

Një e treta e anëtarëve të KQE-së kanë të drejtë të kërkojnë thirrjen e mbledhjes së KQE-së.

Çdo anëtar i KQE-së ka të drejtë të bëjë propozime për ndryshime e shtesa në rendin e ditës, të cilat miratohen apo/ose kundërshtohen me shumicën e thjeshtë të votave të pjesëmarrësve në mbledhje.

Neni 10

Vlefshmëria e vendimmarrjes

Vendimet e KQE-së janë të vlefshme nëse fitojnë shumicën e thjeshtë të votave të pjesëmarrësve në mbledhjen e saj. Vendimet e KQE-së firmosen nga të gjithë anëtarët pjesëmarrës në mbledhje.

Votimi kundër i anëtarit të KQE-së duhet të shoqërohet me shpjegim me shkrim.

Në rastet kur votimi del i barabartë, vota e kryetarit është përcaktuese.

Neni 11

Detyrat e KQE-së

1. KQE përgatit “Listën-tip” të dokumenteve me rëndësi historike kombëtare (më tej RHK).
 2. KQE miraton listat e dosjeve të veçuara për asgjësim nga ministritë dhe institucionet e tjera qendrore që i dorëzojnë dokumentet pranë Arkivit Qendror Shtetëror, për dokumentet që kanë humbur vlerën e ruajtjes të mëtejshme.
 3. KQE miraton listat e dokumenteve të veçuara për asgjësim nga Arkivi Qendror Shtetëror.
- Vendimet e KQE-së u dërgohen institucioneve përkatëse dhe zbatimi i tyre ndiqet nga AQSH.

Neni 12

Shpërblimi

Anëtarët e KQE-së, në përputhje me ligjin nr.9154, datë 6.11.2003 “Për arkivat” neni 14 pika 5, gëzojnë të drejtën e një shpërblimi për çdo mbledhje, në masën 5 mijë lekë. Kryetari shpërblehet me 7 mijë lekë për çdo mbledhje.

Shpërblimi jepet vetëm në rastet e pjesëmarrjes në mbledhje.